


# MU ZABA

 Beto kele ya kieleka bantu yina me kuzwa ntangu ya mbote na kuvwanda awa na suka yayi, na kuvwanda na luzingu na zulu ya ntoto, samu na kumona ntangu yankaka ya nene ya Paki. Paki ke nataka ntangu nionso kima mosi ya nkembo na beto, bivuvu ya malu-malu. Mpe—mpe wapi mutindu ya ke nene!

2 Mpe kaka mutindu mu vwandaka tambula na kati ya kivinga kuna na manima na suka yayi, muntu mosi me kutana munu mpe yandi tubaka, “Mpangi Branham, nge zaba mwa bébé, to mwana mosi ya fioti to muntu mosi, vwandaka sambila na Chautauqua na mvula me luta, yina vwanda na ntima ya yandi ya kukatuka, mpe ba-valve to kima mosi vwandaka na zulu ya yawu.” Yandi tubaka, “Bébé yango belukaka, mpe yandi ke na kati ya kivinga na suka yayi, na yina, mpe yandi kele ya kuvwanda awa na suka yayi.” Na yawu ya ke mbote, beto ke vwanda na mwa kimbangi ya yawu kaka na ntangu yankaka na ntwala beto luta na kisalulu yankaka. Mpe beto kele kaka bantu ya kiese.

3 Ntangu yayi mu ke lomba Mpangi Neville kana yandi ke tanga Masonuku na Matthieu to Luc, mosi, ya mvumbukulu, kana beno me tangaka yawu ntete ve. Nge me tangaka yawu, mpangi-bakala? [Mpangi Neville me tuba, “Ve.”—Mu.] Na yawu, na yina beto kukubama samu na kusambila.

4 Mpe ntangu yayi na manima ya kisalulu yayi, ya ke vwanda kisalulu ya kubeluka ya nzutu. Na manima ya kisalulu yayi, na yina beno ke kwenda na madia ya suka. Na yina, na manima ya yina, beto ke vutuka diaka na ngunga ya yivwa na ndambu mpe beto ke banda kisalulu yankaka. Na manima ya ke vwanda bisalulu ya kubeluka ya nzutu. Na manima ya bisalulu ya mbotika ke landa yina.

5 Mpe yinki ntangu ya kitoko ya kele samu na mbotika! Oh, la la! Mvumbukulu! Yawu yina beto me botama, samu ti Yandi me vumbuka diaka na lufwa.

6 Mu ke bambuka moyo na ntwala beto kuzwa baptistère ya beto awa, mu vwandaka nata bawu kuna na nzadi awa, na suka-suka, basuka ya madidi mutindu galasi, mpe mu ke botika bantu kuna na nzadi. Ya ke na kima mosi samu na yawu, kaka, ya ke ntangu mosi ya busantu. Paki, ya kele ntangu ya nene.

Mu vwandaka tala Mpangi Pat Tyler yina kele ya kuvwanda awa.

7 Mu vwandaka tuba kaka na muntu mosi mazono na nkokila, Ti, lukutakanu ya beto ya nsuka na Oklahoma, mu mekaka, mu ke na kumeka (mpe mu ke zabisa yayi) na kutula yawu na lweka tii kuna Nzambi ke bokila munu na kusala yawu, ministere

ya munu ya ntama ya kuswasikisa mabanza, samu mu banza (mbandukulu) ya ke ministere ya malu-malu yina ke na kwisa.

<sup>8</sup> Na nokokila yina, ata mosi ve zabaka kima mosi samu na yawu, mu mekaka yawu na mwana yina vwandaka kwisa na estrade, yandi butukaka kifwa-meso, bébé; mpe ya vwandaka ya muvimba kifwa-meso, mwana-bakala ya bamvula pene ya kumi na sambanu. Mpe kaka na mbala mosi yandi bokaka, “Mpangi Branham, mu lenda mona!” Mpe kuna, mpe Pat vwandaka. . . Ty- . . . ke ya kutelama pene-pene, kaka pene-pene ya mwana-bakala yango, ntangu meso ya yandi kuzibukaka mbala ya ntete na luzingu ya yandi nyonso. Mpe na yawu mu ke tula kivuvu ti beno awa, na bivuvu ya nene, na munu mosi, mu ke na kusosa kima mosi, Nzambi kusala samu na beto, mpe kuzangula beto na kisika yankaka kulutula yina beto vwandaka.

Beto kulumusa bayintu ya beto ntangu yayi samu na kusambila.

<sup>9</sup> Tata ya beto ya Mazulu ya kifuluka na lemvo, mutindu beto me vukana na suka yayi, awa na mwa yinzo-Nzambi yayi na lweka ya nzila, beto ke vutula matondo mingi na Nge, samu na nionso yayi zola tuba samu na beto, mpe mingi-mingi na suka yayi ya Paki. Kana ya vwandaka ve na Paki, beto zolaka vwanza ve mutindu beto kele bubu yayi. Ti, Paki kele yina tulaka kidimbu na bansilulu ya Nzambi. Ya me siamisama na beto. Bima nionso yina Yandi silaka, ya kumaka kieleka na Paki. Mosi ya bilumbu ya kulutula nene ya mikembu yina beto lendaka vwandaka na yawu na kati ya mvula! Mpe beto ke lombwa, Mfumu, bubu yayi, ti Nge ke pesa kikesa na bantima ya beto mutindu beto me vwanza, ke vingila, mpe na nsi ya bivuvu samu na Mpeve-Santu, Yina me kwisa na manima ya Paki, na kukwisa na bantima ya beto mpe kupesa beto kikesa, mpe samu na kuvutula lukwikilu ya beto, na bitezo ya nene ya ngolo, ti beto lenda kutambula luzingu yina Yesu tumaka beto na kutambula.

<sup>10</sup> Beto ke sambila samu muntu nionso mpe konso muntu, mpe mingi-mingi samu na bayina kele ya kukangama mpe yina lenda kwisa ve na balukutakanu kisika mosi bubu yayi. Nzambi, vwanza na bawu. Mpe bika—bika Paki yayi kuvwanza Paki ya kieleka samu na bawu, mvumbukulu na mbeto, mpe mavimpi ya malu-malu yina ba me zabaka ata fioti ve na ntwala na kati ya luzingu. Pesa yawu, Mfumu.

<sup>11</sup> Bika konso mulongi, konso kisadi Nge ke na yandi na yinza ya muvimba bubu yayi, ya ke mukembu yayi ya nene ya yina beto ke banzilaka, bika bawu kuzwa kupakulama mpe kikesa mpe Ngolo, samu na kunata na mabuundu ya bawu (dimeme yina ke na kuvingila) Madia yina Nzambi kele na yawu na kati ya kibumbulu samu na bantu ya Yandi. Pesa yawu, Mfumu. Beto ke vingila kitini ya beto, na kukikumusa nionso, na Nkumbu ya Mfumu Yesu Klisto. Amen.

<sup>12</sup> Mu ke lomba Mpangi Neville ntangu yayi na kutanga Masonuku ya mvumbukulu.

[Mpangi Neville me tuba, “Matthieu 28:”—Mu.]

*[Na manima ya kilumbu ya saba, na suka-suka ya lumingu, Marie ya mbanza Magdala na ndoyi ya yandi Marie kwendaka tala ntoni.]*

*[Mpe, tala, ya vwandaka na kuningana ya ngolo ya ntoto: samu wanzio mosi ya Mfumu katukaka na zulu, mpe kwisaka mpe balulaka ditadi yina vwandaka na kielo, mpe vwandaka na zulu ya yawu.]*

*[Kizizi ya yandi vwandaka lezima mutindu nsemo ya nzasi, mpe kinkuti ya yandi vwandaka mpembe mutindu mvula ya mpembe:]*

*[Mpe basoda yina vwandaka kengila ntoni kumaka na boma ya kulutula mpe ba bandaka na kutekita, bawu kumaka mutindu bantu ya kufwa.]*

*[Wanzio tubaka na bakento, Beno vwanda na boma ve: mu zaba ti beno ke na kusosa Yesu, yina ba komaka na kulunsi.]*

*[Yandi kele awa ve: yandi me vumbuka na lufwa, mutindu yandi tubaka. Beno kwisa, beno tala kisika yina Mfumu vwandaka.]*

*[Beno kwenda na nswalu, mpe beno tuba na bilandi ya yandi ti yandi me vumbuka na lufwa; mpe, ntangu yayi, yandi ke na kvingila beno na Galilée; ti kuna beno ke mona yandi: tala, nsangu mu me kwisa kuzabisa beno.]*

*[Na nswalu nionso bawu katukaka na ntoni na boma mpe ya kufulukuka na kiese; mpe bawu kwendaka zabisa nsangu yina na bilandi.]*

*[Mpe mutindu bawu kwendaka zabisa nsangu yina na bilandi ya yandi, tala, Yesu kutanaka na bawu, na kutubaka, Mbote ya beno. Mpe bawu kwizaka samu na kusimba yandi makulu, mpe samu na kusambila yandi.]*

*[Na yina Yesu zabisaka bawu, Beno vwanda na boma ve: Beno kwenda kutuba na bampangi ya munu ti bawu kwenda na Galilée, ti kuna bawu ke mona munu.]*

*[Ntangu yayi ntangu ba vwandaka kwenda, tala, ndambu ya basoda yina vwandaka kengila ntoni vutukaka na mbanza, mpe zabisaka bamfumu ya banganga-Nzambi mambu yina nionso salamaka.]*

*[Mpe na yina bamfumu ya banganga-Nzambi vukanaka na bakuluntu ya ba-Juif, mpe bawu wisanaka, na kupesa mbongo mingi na basoda,]*

[*Na kutubaka, Beno ke tuba ti, bilandi ya Yandi kwisaka na mpimpa, mpe ba me yiba yandi na ntangu beto vwandaka ya kulala.*]

[*Mpe kana mfumu kuwa yawu, beto ke zaba wapi mutindu beto ke ndimisa yandi, mpe ata diambu mosi ke kumina beno.*]

[*Na yawu bawu bakaka mbongo, mpe bawu salaka mutindu ba zabisaka bawu: mpe yawu yina disolo yayi mwanganaka na kati ya ba-Juif tii bubu yayi.*]

[*Na yina bilandi kumi na mosi kwendaka na Galilée, na mongo yina Yesu zabisaka bawu.*]

[*Mpe ntangu bawu monaka yandi, bawu fukiminaka yandi: kasi bayankaka vwandaka na maketi-keti.*]

[*Mpe Yesu kwendaka pene-pene ya bawu, mpe tubaka, Ngolo nionso me pesama na munu na zulu mpe na ntoto.*]

[*Na yina beno kwenda, mpe beno longi na bayinsi nionso, beno botika bawu na nkumbu ya Tata, mpe Mwana, mpe Mpeve-Santu.*]

[*Beno longisa bawu na kutumama na mambu nionso yina mu me tumisaka beno: mpe, tala, mu kele na beno bilumbu nionso, tii na nsuka ya yinza. Amen.*]

<sup>13</sup> [Kisika ya mpamba na bande—Mu.] . . . kuyika masakumunu ya Yandi na lutangu ya Ndinga ya Yandi.

<sup>14</sup> Ntangu yayi beto ke tuba, beto ke zabisa diaka ntangu yayi, ti balukutakanu, mpe samu na suka, ke landila na ngunga ya yivwa na ndambu, na ntangu beto ke manisa na yayi, . . . na lukutakanu ya suka yayi ntangu yayi. Mpe na yina beto ke bokila lukutakanu ya beto yayi lukutakanu ya kubasika ya mwini. Mpe beto kele, beto ke na mwa bima ya nene ya kuzabisa beno samu na balukutakanu yina me luta. Mpe beto zola ti beno yina ya kubela mpe kele na mpasi, beno nionso, na kukwisa na lukwikilu na suka yayi, samu na kukwikila ti Yesu yayi yina vumbukaka kele moyo bubu yayi, mpe Yandi kele kaka mutindu mosi mutindu Yandi vwandaka. Yandi me soba ata fioti ve.

<sup>15</sup> Ntangu yayi mu zola kutanga mwa kitini ya Masonuku awa, ya kele na kapu 19 ya Job, kubanda na nzila ya 15.

*Banzenza yina vwandaka kwisa na yinzo ya munu, . . . bakento yina ke sadilaka munu kisalu, ba ke baka munu mutindu nzenza: ba ke zaba munu diaka ve.*

*Kana mu me bokila muntu ya muntu ya kisalu, ata ti mu me bondila yandi na kwisa kusadisa munu; yandi ke zola ve.*

*Kento ya munu ke zola ve kuwa nsunga yina ke basika na yinwa ya munu, bampangi ya munu ke mona munu nzanzi.*

*Yinga, ata mpe bana ya fioti ke seka munu; ba ke finga munu, kana ba me mona munu.*

*Bankundi ya munu nionso ke tina munu boma: mpe bantu yina mu ke zolaka mingi ke yina munu.*

*Munu me konda mu me bikala mikwa-mikwa, meno ya munu me kuma kubasika munu na nganda.*

*Beno bankundi ya munu, beno wila munu mawa, beno wila munu mawa; samu diboko ya Nzambi me simba munu.*

*Samu na yinki beno ke talisa munu mpasi mutindu Nzambi, mpe mpasi beno ke talisa munu me lunga ve?*

*Oh kana bandinga ntangu yayi ba sonikaka yawu! oh kana ba sonikaka yawu na buku!*

*Kana ba sonika yawu na zulu ya ditadi samu yawu zinga tii kuna.*

*Kasi munu zaba . . . mukudi ya munu kele ya moyo, mpe yandi ke telama na kilumbu ya nsuka na zulu ya ntoto:*

*Mpe kana . . . misobi me bebisa nzutu yayi, kaka na nzutu yayi mu ke mona Nzambi:*

*Mu ke mona yandi munu mosi . . . na meso ya munu mu ke mona yandi, mpe muntu yankaka ve; ntima ya munu me lemba na kuvingila yandi.*

<sup>16</sup> Mu ke zola baka dilongi mosi kuna, na Job yayi kapu 19, *Mu Zaba*.

<sup>17</sup> Nkooko na ntangu yayi vwandaka fioti mutindu beto kele bubu yayi. Yandi vwandaka na kati ya bampasi ya nene, mutindu beto ke bokilaka yawu, “bamasa ya nene,” mpe kivuvu ya yandi kumanaka. Bilumbu mingi yandi vwandaka ya kuvwanda na zulu ya mbombi, mpe yandi vwandaka meka na kumona bandinga yina lendaka lembika yandi ntima, vwandaka meka na kuzwa kima mosi yina lendaka pesa yandi kikesa, mpe kima yina zolaka—zolaka vwanaka yina ke pesa yandi kikesa mutindu yandi monaka kento ya yandi me kutina yandi.

<sup>18</sup> Na kisika ya ntete, yandi vwandaka bakala ya kiboba, ya bamvula pene ya makumi yivwa, mpe diboko ya Nzambi bulaka yandi. Ntangu yayi, beto zaba ti Nzambi simbaka yandi ve na diboko ya Yandi, kasi Nzambi pesaka muswa na Satana na kusimba yandi. Nzambi ke vwandaka kaka na bisadi samu na kusala mambu. Nzambi zola ti yimbi kusalama, Yandi ke yambula kaka Satana na kusala yawu. Mpe kana Yandi zola kusala mambote, Yandi kele na bisadi ya Yandi yina Yandi ke yambula samu na kusala yawu.

<sup>19</sup> Mpe Satana simbaka Job samu na lukanu mosi, samu na kumeka yandi, samu yandi na Nzambi vwandaka vwanaka na

ntembe. Mpe Nzambi tubaka na Satana ti, “Mu ke na kisadi mosi na zulu ya ntoto, ya ke na mosi ve mutindu yandi. Nionso yina mu ke tuba na yandi, yandi ke sala yawu. Yandi kele muntu ya kulunga, mpe yandi kele muntu ya kieleka.”

<sup>20</sup> Mpe Satana tubaka, “Kana Nge ke bika munu kaka mu kuzwa yandi, mu ke sala ti yandi kusinga Nge na kizizi ya Nge.”

<sup>21</sup> Job, vwandaka zaba bima yayi nionso vwandaka salama, yandi nataka nkooko na kati kiadi ya nene. Kasi, na mutindu nionso, ntangu bantu nionso kwendaka ntama ya yandi, yandi kangamaka kaka na—na Klisto. “Mu zaba ti Mukudi ya munu kele moyo,” yandi tubaka.

<sup>22</sup> Ntangu yayi beto me kuma na bisika yina. Beto nionso me kuma. Mpe mu ke kwikila ti bubu yayi, ti beto me vukana awa samu na kima mosi mutindu lukanu yina mosi. Beto nionso kele na zulu ya mbombi. Beto kele na bampasi ya beto, mpe beto kele na bakuta mpe kukulumuka ya beto, mpe bantangu ya beto—ya beto ya yimbi, mpe bimbevo ya beto, mpe bimbevo ya beto ya ntima, mpe bakiadi ya beto. Na yawu beto me kwisa mutindu yayi, na suka yayi, na suka yayi ya Paki, samu na kuzwa bandinga yina ke pesa kikesa, mutindu Job vwandaka meka na kuzwa yawu na bankundi ya yandi.

<sup>23</sup> Mosi ve na kati ya bawu lendaka pesa bawu kivuvu. Samu na bampasi ya yandi, ba vwandaka fundisa yandi ti yandi vwandaka nsumuki na kinsweki. Na yina, na kati ya bampasi yina nionso, Nzambi kwisaka kusadisa yandi.

<sup>24</sup> Job vwandaka kukiyufula, Mutindu yandi zabaka, ya vwandaka kaka ve bimbevo mpe bivimbu ya yandi, mpe bampasi mpe bimbevo ya ntima, na kuzimbisaka dibuta ya yandi mpe mavimpi ya yandi nionso, ya vwandaka pene ya kubaka luzingu ya yandi, kasi yandi vwandaka bakala ya kiboba, ya kununa mingi na bamvula, mpe na kuzabaka ti yandi vwandaka kwenda na ntoni. Mpe, na kuzabaka yawu, yandi vwandaka kwikila ti ya vwandaka na muntu mosi yina nataka yandi na zulu ya ntoto, yandi zolaka kwisa kaka awa ve na yandi mosi. Mpe yandi zabaka ti yandi kwisaka na nzila ya tata na mama, kasi, ntete, tata yina na mama yina zolaka kuzwa muntu na kubuta bawu. Mpe ya ke vutula kuna na kisina, “Nani butaka yina, ya ntete?”

<sup>25</sup> Na manima yandi kukiyufulaka mutindu yayi. “Ya ke diambu ya ngitukulu ti mu kele awa, ke tambula sika na sika, na luzingu ya zulu mingi kulutila ya niama, mpe luzingu ya zulu mingi kulutila luzingu ya yinti.” Kasi ntete beto ke mona ti yandi tubaka, “Kana yinti kufwa, ya ke zinga diaka. Mpe kana fololo kufwa, ya ke zinga diaka.” Kasi yandi tubaka, “Muntu ke lala, yandi ke kufwa, mpe wapi sika yandi kele? Bana ya yandi ke kwisa kudila yandi mpe ba ke kwisa pesa yandi lukumu, mpe yandi ke zaba yawu ve.” Mpe yandi vwandaka kukiyufula, “Yinki vwandaka diambu ti—ti Nzambi lendaka bika luzingu

ya mutindu yina kuzinga diaka, mutindu bafololo mpe bayinti, kasi muntu lendaka zinga diaka ve?” Nionso yayi vwandaka yangisa yandi.

<sup>26</sup> Mpe kana beto ke basisa dibanza yayi na suka yayi. Mpe yawu yina beto kele awa. Beto me kuwaka disolo ya Paki, mbala na mbala, mpe beto me tangaka yawu kubanda na mbandukulu tii na nsuka; mpe bubu yayi, na bansangu ya radio, beno ke kuwa balongi ya mutindu na mutindu ke tubila yawu. Kasi yina mu me banza, samu na mwa nkonga ya munu na suka yayi, yina Mfumu me pesa munu, Mu ke zola kutubila yawu na mutindu yankaka kana mu lendaka, kukuma na kisika yayi: Samu na yinki beto me kuma na bampasi yayi? Yinki ke sala ti bima yayi kukwisa? Samu na yinki Muklisto lendaka vwalangana ve? Samu na yinki ve mambu nionso, ke tambula kaka mbote samu na Muklisto? Kasi ya ke mutindu yina ve, mpe beto me zaba yawu.

<sup>27</sup> Mpe bantangu yankaka beto ke kuma na bampasi mingi na ntangu beto ke kuma Muklisto kulutila na ntangu beto vwandaka bansumuki. Samu, Ya me sonama, “Bampasi mingi ke kwisaka na bantu ya mbote, kasi Nzambi ke kukuulaka bawu na nionso.” Nzambi silaka bampasi mingi, bansatu ya ngitukulu, mpe mambu ya ngitukulu yina lendaka vwanda na zulu ya lubakusu ya beto, kasi ya ke salama ntangu nionso samu na mambote ya beto. Beto lenda kaka kubakula yawu ve, samu, kana beto bakula yawu, na yina ya ke vwanda lukwikilu ve samu na beto; beto ke kwenda na lubakusu. Kasi beto ke salaka yawu, mpe beto ke na yawu, mpe beto ke kwikila na lukwikilu, Ndinga ya Yandi, ti ya ke sala mambu ya mbote samu na beto. Kana beto lendaka simba yawu bubu yayi, na suka yayi—yayi! Kana beto lendaka simba ti bampasi ya beto nionso, mpe ya ke na mosi ve na kati ya beto yina ba me keba na yawu, mpe kana beto lendaka bakula ti bima yina kele samu na bumbote ya beto!

<sup>28</sup> Ya me sonama, na mosi ya Masonuku na kati ya Biblia, ti, “Bakumekama ke kwisa na zulu ya beto, ya kele ya ntalu mingi samu na beto kulutila wolo yawu mosi, samu ya ke Nzambi ke pesa beto bakumekama yayi.” Na manima beto me kuma ba ya Yandi, kundima ya beto mpe mbotika ya beto, mpe nsilulu ya beto kele kutambula na luzingu samu na Yandi, na yina bakumekama nionso yina ke kwisa na zulu ya beto kele samu na kukumisa beto ya kulunga samu na nkembo ya Yandi. Ya ke samu na kunata beto kisika yina Nzambi lenda kukikumisa Yandi mosi ya kieleka mingi kulutila Yandi vwandaka na ntwala kumekama kukwisa.

<sup>29</sup> Mu ke zola kuvukana na Job na suka yayi, samu na kutuba ti mu me zinga mingi samu na kuzaba ti ya kele Kieleka. Mu me monaka yawu na luzingu ya munu mosi, ti konso ntangu diambu ya nene ke basika, ti mu lenda luta na lweka ya yawu ve, to na nsi ya yawu to na zulu ya yawu, Nzambi ke sala nzila, mpe ke

basika ya nkembo. Mu ke kukiyufula kaka wapi mutindu lemvo ya Yandi me sala yawu, kasi Yandi me sala yawu.

<sup>30</sup> Mpe beno bambuka moyo, na kati ya bima yayi, Satana ke meka na kukotisa beto na kidi-kidi, mpe ke vwalangisa beto, samu beto banza, “Oh, samu na yinki *yayi* me salama? Samu na yinki ya lendaka vwanda mutindu *yayi*?”

<sup>31</sup> Na mwa bilumbu me luta ntangu mu basikaka na kisika ya kulutila kitoko, mpe ya kulutila mbote mu me monaka ntete ve na luzingu ya munu nionso, ya vwandaka kivinga ya nene ya mpangi ya beto ya bakala, Oral Roberts. Ntangu mu monaka marbre yina ya ngolo, mpe ata na nela mosi ve kisika mosi na kati ya yawu, kasi wapi mutindu ba salaka yawu! Mpe mu me vwandaka na Hollywood mpe mu me vwandaka na bayinzo ya bantinu, mpe mu me vwandaka na bisika nionso yina mu lendaka vwanda, na yina, na yinza ya muvimba, mpe bisika nionso ya kitoko, mpe bayinzo ya kitoko, kasi mu me monaka kima mosi ve, kisika mosi ve, ya kufwanikisa, na yawu, ata kisika mosi ve. Wapi mutindu mwa bansinga ya aluminium ke baluka kintwadi, mpe, oh, mu me monaka ata fioti ve kima ya kulutila kitoko mutindu yina na luzingu ya munu. Ntangu mu vwandaka tambula kuna, mpe mu bakaka maboko ya munu mpe mu simbaka makunzi yina ya pilastre, na—na granite ya nene; nionso na mutindu ya butatu ya Tata, Mwana, mpe Mpeve-Santu, balutungu ya yawu. Bima yayi nionso! Mu me katuka kaka na sika ya Mpangi Tommy Osborn, mpe mu me mona ksalu ya yandi ya nene, ya ngolo kuna samu na Mfumu.

<sup>32</sup> Mu telamaka kuna na nganda, mu talaka yinzo yina ya nene, mpe mu banzaka, “Nzambi, ya kieleka mu me kuma muntu ya luvunu, ya kieleka mu me kuma kizieti, kisika mosi kuna; samu, ba-ministere ya bantu yayi me katuka na munu.” Mpe mu banzaka, “Yinki? Ntangu yankaka mu ke muntu ya kutudila ntima ve, Mfumu, ti Nge lendaka ve kutula ntima na munu na kima mosi ya mutindu yina. Ata mpe ya fioti mwa, mwa ba-dollar yina Nge bikaka ti mu futa ba-campagne mpe bima, ntangu yayi ba ke zola kufundisa munu samu na yawu. Mpe samu na yinki mu ke muntu ya luvunu mutindu yayi, to samu na yinki mu ke muntu ya kutudila ntima ve mutindu yayi?”

Mu vwandaka na zulu ya mbombi, mutindu Job vwandaka kiboba.

<sup>33</sup> Ntangu mu telemaka na nganda kuna, mpe mu lendaka kupema na mpasi, na ntwala ya kima yayi ya nene; mwana-bakala yina ya mputu yina me butuka na kati ya bwatu, Pentecotiste, lendaka sala yinzo yina ya nene ya mammoth. Mpe mu banzaka, “O Nzambi ntangu yankaka mu me lunga ve.”

<sup>34</sup> Kaka na ntangu yina mwa Ndinga mosi ya fioti kwisaka na munu na kati ya couloir, mpe tubaka, “Kasi Mu kele kitini ya nge.”



35 Na yina mu banzaka, “O Mfumu Nzambi, oh, bika kaka yina bikala mutindu yina, ntangu yayi, Mfumu. Mu . . . samu mu ke na mayele ve samu na kusala kisalu ya nene ya mutindu yina samu na Nge. Mpe mu kele muntu yina me longukaka ve. Kasi, na ntangu nionso Nge ke kitini ya munu, mu kele ya Nge, mpe Nge ke twadisa munu. Mu lendaka kukitwadisa munu mosi ve. Kasi, O Mfumu, twadisa munu!”

36 Ya ke bangunga yina ya mpasi yina ke tindika beto na zulu ya bazelo yina ya busantu. Ya vwandaka na kati ya Biblia. Mpe beno bambuka moyo, ata yinki mutindu kiadi kele nene, Satana lenda baka luzingu ya beno ve kana Nzambi me manisa na beno ve. Ya ke na kima mosi ve lendaka kumina beno kukondwa Nzambi kupesa yawu muswa. Ya ke na mpeve ya yimbi mosi ve lenda kwisa kukondwa Nzambi kupesa yawu muswa. Mpe ya ke samu na mambote ya beno Yandi ke na kusala yawu. Beto banza na yawu.

37 Kuna ntangu masa fulukaka samu na kubebisa yinza, ya zolaka bebisa Noé ve. Noé lendaka kubeba ve, samu ti Nzambi vwandaka na kisalu na yandi ya kusala.

38 Kilumbu mosi, kuna na yinsi ya nene na nsi ya kimpika ya nene, ya vwandaka na bana ya ba-Hebreux yina beto me zaba mutindu Chadrack mpe Mechack na Abednego. Mpe ya kumaka kisika yina ba lendaka baka lukanu, ti kima mosi zolaka salama. Ba vwandaka . . . Ba mekaka lukwikilu ya bawu—ya bawu—ya bawu.

39 Mpe ntangu lukwikilu ya beno ke mekama, na yina beno kubwa ve. Beno bikala ya kusungama na yina beno ke kwikilaka.

40 Mpe na yina ba mekaka lukwikilu ya bawu (Mpe ba kumaka na ngunga ya mpasi, ya kele kaka ve ti ba kwendaka na mbombi, kasi ba kotaka na dibulu ya tiya, kasi Satana lendaka bebisa bawu ve, samu lukanu ya Nzambi vwandaka me lunga ntete ve.), ba lendaka kota kuna na kivuvu yayi: “Mu zaba ti Mukudi ya munu kele moyo!” Ba lendaka kota kuna na kivuvu yayi awa, “Beto me ndima ti Nzambi kele na kiyeka ya kukuula beto na dibulu yayi ya tiya, kasi, ata mutindu yina, beto ke fukimina ve kifwani yina.”

41 Satana zolaka baka bawu ve. Yandi lendaka ve kufwa Noé na kati ya masa, tii lukanu ya Nzambi lungaka. Yandi lendaka ve kuyoka na tiya bana ya ba-Hebreux, tii lukanu ya Nzambi kulunga. Yandi zolaka ve kufwa Job na bivimbu mpe bampasi, tii lukanu ya Nzambi zolaka lunga. To bankosi lendaka ve kudia Daniel, tii lukanu ya Nzambi zolaka lunga. To lufwa lendaka mpe bununu lendaka ve kubaka Abraham, tii lukanu ya Nzambi kulunga.

42 Mpe dyaka ya lenda baka beno ve, to ya lenda baka munu ve, tii lukanu ya Nzambi, na luzingu ya beto, me lunga. Na yawu, beto ke vukana na kisika yina, kivuvu.

43 Mpe samu na yinki Nzambi ke bikaka bampasi kukwisa? Nzambi ke kangaka bampasi, Yandi ke tulaka bansinga na kati ya yinwa ya yawu mpe ke sala ti yawu kutumama na Yandi, mpe bampasi yina ke nataka beto pene-pene na kimpangi na Nzambi.

44 Ya vwandaka ve na arc-en-ciel tii kufuluka ya masa kwisaka. Kasi na manima ba pusaka Noé na kukota na mutindu yina yandi vwandaka, na kuluta na zulu ya masa bilumbu mpe bampimpa makumi yiya, na kati ya kitembo, mpe mwa nzaza vwandaka kumata mpe kukulumuka na masa; ya vwandaka na manima ya masa kukulumukaka, ti yandi monaka arc-en-ciel samu na mbala ya yandi ya ntete, ngwisani ya kivuvu, ngwisani ya nsilulu. Na manima yandi lutaka na ntangu ya mpasi, na manima yandi monaka nsilulu.

45 Ya ke mutindu yina beno ke mona nsilulu, na manima beno me luta na kati ya lukwamusu. Mu ke zolaka poeme yina, to, psaume:

Mu fwana kwenda na Zulu  
Na zulu ya mbeto ya bafololo ya kukondwa  
mpasi,  
Na ntangu bayankaka nwanaka samu kubaka  
ndandu  
Mpe zabukaka na kati ya banzadi ya menga?

46 Beto ke lomba kikesa mpe ngemba. Nzambi ke pesaka beto ya kulutula kitoko Yandi lendaka pesa beto: bakumekama mpe balukwamusu. Ya ke kitoko mingi kulutula kikesa mpe ngemba. Kikesa ya kele kaka na zulu ya nzadi.

47 Ya vwandaka tii kuna ba tindaka na ngolo bana ya ba-Hebreux na kukota na dibulu ya tiya, na mosi ya bakumekama ya bawu ya kulutula nene, ti ba monaka Muntu mosi mutindu Mwana ya Nzambi ya kutelama na kati ya bawu. Bamapsi ya bawu butaka Mwana ya Nzambi ya kutelama na kati ya bawu, na kati ya mwa mupepe mosi ya fioti, samu na kukatula kitembo ya tiya. Kasi ya kele ve tii kuna ba kotaka na kati ya tiya ti Nsadisi kwisaka.

48 Ya vwandaka Daniel yina bakaka lukanu na kati ya ntima ya yandi ti yandi lendaka kukitula mvindu ve na bima ya yinza, mpe ba kotisaka yandi na ngolo na kumekama, kana ya lendaka sambila Nzambi to kukwenda na dibulu ya bankosi. Kasi ya vwandaka na manima ya mwini vwandaka ngolo, mpe ba losaka yandi na dibulu ya bankosi, ti, na manima ya yina, yandi monaka Wanzio ya Mfumu me telama na kati-kati ya yandi, na kutulaka na lweka, Dikunzi yina ya Tiya vwandaka me telama na kati-kati ya yandi na bankosi. Mpe bankosi lendaka simba yandi ve, samu yandi vwandaka na kati ya bakumekama mpe bampukumunu

mpe bampasi. Mpe yandi zabaka ti Nzambi yayi vwandaka na kiyeka ya kukuula yandi na yawu.

<sup>49</sup> Ya vwandaka Abraham, na manima yandi monaka ti ntoto vwandaka kutuba ve, mpe kuyuma kwisaka, mpe Lot kabwanaka yandi mosi mpe yandi kwendaka zinga luzingu ya kitoko na yinza, Ya vwandaka na manima yandi kuwaka kudila mpe kuboka ya—ya mivungi ya yandi, ti matiti kele ve samu na bitwisi ya yandi, kasi yandi bikalaka na yinsi yina Nzambi pesaka yandi mpe tubaka na yandi na kuzinga. Mpe na yina kilumbu yina, na manima yandi mekaka tii mvibudulu ya yandi—ya yandi kumaka na nsuka, ya vwandaka kilumbu yina, ntangu kumekama kumaka na nsuka, yandi solulaka mbunzu na mbunzu na Elohim na nsi ya chène kilumbu yina. Ya vwandaka na manima yandi lutaka na bakumekama ya yandi, na manima yandi lutaka na bampasi yina yandi monaka, ti Nzambi monanaka na yandi na kifwani ya Muntu; mpe vwandaka kuna mpe tubaka na yandi ti yandi vwandaka ya kukwela mpe nkumbu ya kento ya yandi vwandaka Sarah, mpe tubaka ti yandi vwandaka seka Yandi, na kati ya tenta kuna na manima. Ya vwandaka kuna ti Abraham bokilaka Yandi “Elohim.” Ya vwandaka na manima ya kumekama mpe lukwamusu.

<sup>50</sup> Oh, kana Dibuundu zolaka kaka kuvumbuka Yawu mosi bubu yayi, samu na kutala ti na manima ya bampasi mpe bakumekama, mpe maseka mpe masawula, bima yina Dibuundu me luta, Dibuundu ya pentecote, ti beto ke mona Nzambi na kati-kati ya beto, kusala bidimbu ya nene, mpe mambu ya ngitukulu.

Na manima ya minianga mpe bampasi ya  
kilumbu,  
Na manima nionso ke luta,  
Na yina beto ke mona Yesu na nsuka.  
Yandi ke vingila munu, Yesu ya kulunga mpe  
ya kieleka,  
Na zulu ya Kiti ya Yandi ya kimfumu ya kitoko,  
Yandi ke yamba beto na Yinzo  
Na ntangu kilumbu ke suka.

Na yina ya kele kilumbu, beto sala kingolo-ngolo.

<sup>51</sup> Bantu yayi nionso ya nene, yina lendaka ntangu mingi ya kisalu ya beto ya suka, samu na kuzonzila yawu. Ba lutaka na kati ya bakumekama, mpe ba monaka Nzambi. Ba lutaka na kati ya bakumekama, mpe monaka Bawanzio. Ba me lutaka na kati ya bakumekama; mpe baluzayikisu, mpe ba monaka bidimbu mpe mambu ya ngitukulu, mpe bima.

<sup>52</sup> Kasi, oh, ata mosi ve na kati ya bawu monaka yina Job monaka. Bantu nionso, na manima ya kumona Bawanzio, mpe kumona Nzambi mpe bima yayi nionso, ba monaka ata fioti ve kima mosi samu na kupesa bawu kivuvu na zulu ya ntoni. Kasi Job monaka mvumbukulu! Yandi monaka Paki. Yandi monaka

kima yina ke pesaka kikesa na konso ntima. Na yina ntangu yandi tubaka, “O kana ba lendaka sonika bandinga ya munu na buku! O kana ba lendaka sonika yawu na kilapi ya kisengo, na zulu ya ditadi!”

<sup>53</sup> Beno me mona, yawu, bima nionso kumaka yimbi samu na yandi. Misadi ya yandi, ata mpe misadi ya yandi vwandaka zola ve kuzonza na yandi. Kento ya yandi vwandaka nzenza. Ya vwandaka kuna, na zulu ya mbombi, kumekama yina ya nene. Mpe dibuundu kwisaka, mpe pesaka yandi mukongo, bilumbu sambanu. Mpe ata mosi ve samu na kupesa yandi kikesa!

<sup>54</sup> Na yina yandi fwana mona vision ya Paki, ntangu yandi bokaka, “Mu zaba ti Mukudi ya munu kele moyo, mpe na bilumbu ya nsuka Yandi ke telama na zulu ya ntoto. Mu zaba! O kana ba sonikaka bandinga ya munu na kilapi ya kisengo, na ditadi, ti bandinga ya munu zolaka zimbana diaka ata fioti ve, samu mu zaba ti Mukudi ya munu kele ya moyo! Mu zaba! Mu zaba!”

<sup>55</sup> Yinki nge me zaba, Job? “Mu zaba ti Mukudi ya munu kele moyo.” Beno me mona, ya vwandaka kaka ve Muntu mosi ke zinga, kasi Yandi vwandaka Mukudi samu na Job!

<sup>56</sup> Oh, Nkumbu ya Mfumu kusakumuka! Mu ke na kiese mingi ti mu kele kitini ya Paki, ti mu kele kitini ya mvumbukulu! Mpe beto kele kitini ya yawu na suka yayi, samu na kati ya beto ke zinga Luzingu yina ya mvumbukulu (yina kele, yina ke kota na kusalu) yina nataka Paki. “Mu zaba ti Mukudi ya munu . . .” Yinki nge me zaba? Mu ke na kubanza na yawu ve; beto ke na mabanza mingi bubu yayi. “Mu zaba ti Mukudi ya munu kele moyo!” Yinga, tata.

<sup>57</sup> Ntangu yayi yinki Yandi vwandaka? Kana Yandi zingaka, Yandi vwandaka Mukudi samu na Job. “Ya munu,” ya munu mosi, *ya munu*, “Mukudi ya munu kele moyo!”

<sup>58</sup> Mpe yinki yankaka nge me zaba, Job? Yinki nge me mona na kati ya vision yina? “Mpe na bilumbu ya nsuka, Yandi ke telama na zulu ya ntoto. Mpe kana misobi me bebisa nzutu ya munu, kasi na nzutu ya munu mu ke mona Nzambi, Yina mu ke mona munu mosi. Mu zaba ti Mukudi ya munu kele ya moyo, mpe Yandi ke telama na kilumbu ya nsuka na zulu ya ntoto. Ata ti ntima ya munu me lemba na kuingila, kana musobi me bebisa nzutu ya munu, kasi na nzutu ya munu mu ke mona Nzambi.” Na yina ya vwandaka na vision ya kulutila nene.

<sup>59</sup> Daniel monaka Wanzio. Bana ya ba-Hebreux monaka Mwana ya Nzambi. Noé monaka arc-en-ciel. Abraham monaka Nzambi, mbunzu na mbunzu. Kasi, Job monaka mvumbukulu, Job monaka na ntwala. Bankooko nionso mpe basantu ya nene, ya Biblia, monaka na ntwala kilumbu yina; na kivuvu, na kati ya ba-vision, na kati ya baluzayikisu, ti ntangu ya mvumbukulu ke kwisa.

<sup>60</sup> Ntangu yayi beto ke mona ya nene ke landila na ntwala. Beto ke mona bangolo ya nene ya Nzambi. Beto ke mona bima ya nene yina Yandi lendaka sala. Beno lendaka tala mwini mpe—mpe kuzaba ti ya kele Ngolo ya Nzambi ve yina ke sala ti yinza kubaluka na lweka ya mwini yina. Beno lendaka ve kumona printemps ke kwisa kukondwa kuzaba ti ya kele na Nzambi. Beno lenda mona kubeluka ya meso ya mpofo, ya kifwa makutu, kuzaba ti ya kele Nzambi. Kasi yinki kana ya vwandaka nionso yina vwandaka, mpe na manima beto ke kufwa ti beto me kwenda? Kasi mvumbukulu, Paki, oh, yawu yina tulaka kidimbu na bima nionso yina Nzambi me silaka, ya vwandaka mvumbukulu.

<sup>61</sup> Mpe bawu fwana vwanda na kulunsi, na ntwala beno lenda vwanda na mvumbukulu. Mpe na ntwala Dibuundu ke vwanda na kiyeka ya kumona Ngolo ya mvumbukulu, na ntwala mu ke mona ministere ya malu-malu kubaka kisika munu mosi, na ntwala beno ke kota na ngwisani ya malu-malu na Nzambi, ya fwana vwanda na kulunsi ya konso muntu samu ti mvumbukulu kukwisa. Beto fwana kufwa na mabanza ya beto, kufwa na banzila ya beto, kufwa na bima yina nionso kele pene-pene ya beto, kuluta na bakumekama mpe bankwamusu, ti beto lenda mona mvumbukulu ya malu-malu, Luzingu ya malu-malu. Na ntwala nsumuki lenda kukuma Muklisto, lufwa fwana kukwisa, na manima mvumbukulu.

<sup>62</sup> Ntete Abraham kumona Elohim, ya zolaka vwanda na bamvula makumi zole na tanu ya kumekama. Ntete bana ya ba-Hebreux kumona Mwana ya Nzambi, ba kotaka na dibulu ya tiya. Ntete Daniel kumona Wanzio, yandi kotaka na dibulu ya bankosi. Ntete Job kumona mvumbukulu, yandi zolaka kota kuna mpe kuzimbisa nionso yina vwandaka na yandi; kasi na manima, na nzila ya vision, yandi monaka!

<sup>63</sup> Mpe kana Job na nzila ya vision lendaka kangama na nsilulu, wapi mutindu beto lendaka sala ya kulutila, na manima Klisto me vumbuka na lufwa mpe me kuma Mbuma ya Ntete ya bayina me lala, mpe me fidisa Mpeve-Santu mutindu kidimbu ya nsilulu, na zulu ya beto, ti beto mpe ke zinga. “Samu Mu ke zinga, beno mpe ke zinga!” Kumona Mvwandulu ya Yandi ya nene na kati-kati ya beto, kusala, kusala bidimbu ya mutindu mosi mpe mambu ya ngitukulu yina Yandi salaka na zulu ya ntoto, na kupesaka beto kivuvu. Mpe beto me kuma na mvumbukulu, na manima beto ke bikala na zulu ya mbombi ya beto? Beto basika na mbombi bubu yayi, na vision ya malu-malu, na Ngolo ya malu-malu, na dibanza ya malu-malu ti beto ke mona Nzambi na Ngolo ya Yandi. Beto ke mona mvumbukulu ya bima ke kwisa.

<sup>64</sup> Beto kele na ntangu ya lufwa. Beto kele ya kuvwanda na bielo ya lufwa. Bayinsi kele na bielo ya lufwa.

<sup>65</sup> Russie me kuzwa munduki ya malu-malu, mutindu beno nionso me kuwa na radio mpe bima. Ba fwana kwisa awa ve mpe kumwanga yawu na bombe. Bawu lenda kaka kunata mwa kima mosi awa, mpe ba ke baka na kati ya balangididi ya bawu, mpe kumwanga mwa kima mosi na kati ya konso yinsi yina, mpe bantu nionso ke ningana ve bangunga makumi zole na yiya. Beno banda kunwana mpe, ntangu beno ke vumbuka, Russe mosi ke bula beno na lweka, mukengi mosi ya Russe ke botula yinzo ya beno, ke baka na ngolo kento ya beno, ke losa bana ya beno na bala-bala, mpe ya ke baka yinzo ya beno. Ba lenda sala yawu. Ba lenda zimbisa kima mosi ve. Ba fwana vwanda na yawu. Muntu mosi ve kuzaba yina ya kele. Beno me mona, bima nionso ke na kusala kintwadi. Ntangu yayi bawu lenda sadila yawu mpe beno vwanda na boma ya yawu ve, samu muntu yankaka ve ke na yawu.

<sup>66</sup> Beto me zaba ve wapi mutindu yawu ke kwisa, yinki ke salama. Kasi beto zaba kima mosi, ti beto kele na zulu ya mbombi. Yinsi, kele na zulu ya mbombi. Yinza kele na zulu ya mbombi.

<sup>67</sup> Mpe samu yinza kele na zulu ya mbombi, mu ke na kiese ti Mpeve ya Nzambi lenda kwisa, mpe beto lenda tuba, “Mu zaba ti Mukudi ya munu kele ya moyo, mpe na kilumbu ya nsuka Yandi ke telama na zulu ya ntoto!” Kilumbu mosi Yandi ke kwisa! Kuyituka ve ti muyimbi sonikaka:

Na luzingu, Yandi zolaka munu; na lufwa,  
Yandi vulusaka munu;  
Na kuzikama, Yandi nataka ntama masumu ya  
munu;  
Na mvumbukulu, Yandi me nungisa munu ya  
mpamba kukonda nsuka:  
Kilumbu mosi Yandi ke kwisa—oh, kilumbu ya  
nkembo!

<sup>68</sup> Ya lombaka Gethsémane, kubasika ya matanga ya Menga na mpusu ya Yandi, na ntwala ya yina. Mpe ya lombaka mpasi ya kulutila mingi ya Calvaire, na ntwala nzikisa lendaka kwisa ya Nzambi ya Kukonda nsuka Yina lendaka vumbula bafwa. Ya lombaka—ya lombaka Gethsémane mpe Calvaire, samu na kusala Paki. Ya kieleka ya salamaka.

<sup>69</sup> Wapi mutindu bantumwa yina na suka yina, ntangu ba sukaka ntima, na yina Pierre tubaka, “Mu me suka ntima, mu ke banza ti mu ke vutuka diaka na kuloba mbisi. Mu ke vutuka kuna. Mu—mu me mona Yandi.”

<sup>70</sup> Ba vwandaka na bivuvu ya nene, mpe kwikilaka mpe nionso yina, tii ya kumaka na kisika yina ya nene ya mudidi. Yinki Nzambi vwandaka sala? Yandi vwandaka nata bantumwa yina na mbombi. Yandi vwandaka nata bawu na kisika yina ba

lendaka—ba lendaka vwanda na lukwikilu ya bawu yina me siamisama na bawu.

<sup>71</sup> Mpe Pierre tubaka, “Mu—mu me mona Yandi kusala bimangu ya nene kuna na Galilé. Kasi, oh, Yandi me lala kuna, me fwa, na madidi, na kati ya ntoni! Mu ke kwikila ti mu ke kwenda kuna na nzadi na suka yayi mpe mu ke losa filet, mpe mu ke kwenda kuloba mbisi. Ntangu yankaka mu lenda tala kuna na simu ya nzadi, mpe mu ke kuzwa. Mu ke bambuka moyo mu monaka Yandi ntangu Yandi vwandaka vingila beto na kumu. Mu ke kwikila ti mu ke kwenda kaka kuna.”

<sup>72</sup> Mpe bantumwa tubaka, “Benzo zaba yinki? Mu ke kwikila ti mu ke kwenda na nge.” Oh, ba vwandaka zaba diambu mosi ve. Bawu dilaka tii kuna meso ya bawu vimbaka.

<sup>73</sup> Wapi mutindu beto me zaba kukwenda na bisika yina! Wapi mutindu beto me zaba! Beto nionso me zaba bima yina.

<sup>74</sup> Mu ke bambuka moyo ntangu mu tulaka muntu mosi ya ntalu kuna na kati ya ntoni, kuna na zulu ya mingo, yina ba me bokila Eastern, to Cimetière Walnut Ridge. Wapi mutindu mu tulaka bébé ya fioti na kati kuna! Mpe mu lendaka dila na zulu ya diboko ya mama, na yina, mu dilaka tii mu lendaka kudila diaka ve. Mu salaka bima nionso yina mu me zaba. Tii, mu bakaka munduki, samu na kumeka na kukifwa, mu vwandaka na ntangu ya mutindu yayi. Mpe ya vwandaka na ngunga yina, na kati ya mwa kivinga yina kuna na zulu, na zulu ya mabolongo ya munu, ti Mazulu zibukaka, mpe mu monaka yandi ya kutelama kuna na kitoko ya nene ya kukondwa kufwa. Ya vwandaka na ngunga yina mu kuwaka maboko ya yandi kwisaka pene-pene ya mapeka ya munu, yandi tubaka, “Bill, nge ke bakula ve. Beto kele mbote mingi kulutula nge.”

<sup>75</sup> Benzo me mona, ya ke lomba kulunsi. Ya ke lomba kunika fololo, samu na kubasisa mananasi na yawu. Ya ke lomba kunikama ya luzingu, samu na kuzwa ya kulutula mbote na nganda ya yawu yina kele. Ya kele samu na yina ya lombaka ti ba nika Yesu, samu na kubasisa yina Yandi vwandaka. Yandi lendaka telama ve na ntuala ya kulunsi, mpe kutuba, “Ngolo nionso na Mazulu mpe na ntoto me pesama na diboko ya Munu.” Kasi na manima ya kulunsi, Yandi lendaka kutelema mpe kutuba, “Bangolo nionso na Mazulu mpe na ntoto me pesama na diboko ya Munu!” Kasi yinki yawu salaka? Ya lombaka kulunsi ntete.

<sup>76</sup> Ya lombaka kunikama mpe kiadi ya bantumwa. Ba monaka Mvulusi ya bawu, Yina bawu zolaka, mpe ba monaka Yandi mpe ke vumbula bamvumbi na—na ntoni. Ba monaka Yandi ke sala yawu. Na manima ba banzaka, “Yandi me lala kuna, na madidi, na kati ya ntoni, Yandi mosi, na suka yayi.” Ya lombaka . . .

<sup>77</sup> Bantu yina monaka Yandi ke zibula meso ya bampofu, ba monaka Yandi me telama kuna mpe ke zaba mabanza yina

vwandaka na bantima ya bantu, “Wapi mutindu Yandi zabaka,” bawu tubaka, “yina vwandaka kwisa na manima ya Yandi? Wapi mutindu Yandi zabaka? Samu na yinki Yandi zabaka ti Judas, Judas ke—ke teka Yandi? Samu na yinki Yandi zabaka ve ti basoda vwandaka kwisa kuna na zulu ya bamongo, na bayinti mpe bambele mpe nionso, samu na kukanga Yandi, kana Yandi lendaka zaba mabanza ya bawu?”

<sup>78</sup> Beno me mona, diabulu vwandaka sala na zulu ya bawu, ya vwandaka tula bawu na zulu ya mbombi, samu bawu ba zolaka kupesa yandi kimbangi mosi ya “Mu zaba.” (Ya kele ve “mu banza” to “ntangu yankaka ya ke mutindu yina.”) “Mu zaba! Mu zaba!”

<sup>79</sup> Mpe beno bambuka moyo, bakumekama yina ke kwisaka na zulu ya beno mutindu mosi, samu beno kutuba ve, “Mbote, ntangu yankaka Yandi kele ya kusungama, ntangu yankaka Masonuku kele kieleka, ntangu yankaka kubeluka ya Kinzambi kele ya kusungama, ntangu yankaka Mpeve-Santu kele ya kusungama.” Kasi ntangu beno ke kuzwa nzingilu yina mpe kubasika na mbombi yina, mpe beno kuzwa luzayikisu ya Nzambi, na nzila ya mbotika ya Mpeve-Santu, beno lenda boka, “Mu zaba ti Mukudi ya munu kele moyo, samu Yandi ke zinga na kati ya munu!”

<sup>80</sup> Pierre tubaka, “Mu ke kwenda kuloba mbisi.” Bantumwa tubaka, “Mu ke kwikila ti mu ke kwenda kaka na nge.” Mpe ba vwandaka kuna na zulu ya mbombi ya bawu, kuna na kati-kati ya nzadi, mpe mpasi landilaka mutindu ya vwandaka. Mpe mu lenda kuwa mosi na kati ya bawu kutuba, “Oh, wapi mutindu ya lendaka salama, Pierre? Wapi mutindu kima ya mutindu yina lendaka vwanda ti Muntu ya mutindu yina lendaka kufwa? Wapi mutindu ba lendaka tula Yandi na ntoni mutindu ba tulaka Yandi? Wapi mutindu Yandi lendaka bika ba losila Yandi mate na kizizi mpe ba tumuna mandefo, ba tula yimpu yina na zulu ya yintu ya Yandi? Wapi mutindu Yandi lendaka sala yawu, oh, mpe kuvwanda kaka Nzambi? Mu lenda bakula yawu ve.” Oh, yinki kiadi yayi!

<sup>81</sup> Mpe na mbala mosi, bawu talaka kuna na kumu, kaka luzayikisu ya mutindu mosi na yina Job kuzwaka, kuna ba monaka yina Job monaka bamvula mafunda yiya na ntwala. Mukudi vwandaka me telama kuna, ya moyo mpe ya kieleka, ya kutelama na kumu. Na tiya yina ba me sala, mpe ba lambaka mbisi na zulu ya yawu mutindu yina, mpe tubaka, ba me bokila bawu.

Yesu kele na mesa mosi kisika basantu ya  
Nzambi ke kudia,  
Yandi ke bokila bantu ya Yandi yina soolamaka  
“Beno kwisa kudia;”



Yandi ke kudisa na mana ya Yandi Mpe ke pesa  
bansatu ya beto nionso;  
Oh, yawu, ya kele mbote na kudia na Yesu  
ntangu nionso!

Wapi mutindu beto lenda banza yawu, wapi mutindu ya lombaka bima yina ya nene!

<sup>82</sup> Wapi mutindu, ntumwa Paul, ntumwa yina ya nene yina lutasaka ntangu ya yandi ya mpasi ntangu yandi ndimaka lufwa ya Etienne, mpe yandi monaka mwa kizizi ya yandi kuna na Zulu, mpe matadi vwandaka bula yandi na kizizi, mpe yandi talaka mpe yandi tubaka, “Mu ke mona Mazulu me zibuka. Mu ke mona Yesu me telama na diboko ya kibakala ya Nzambi.” Yandi tubaka, “Mfumu, kutula ve disumu yayi na zulu ya bawu.” Mpe Paul vwandaka simba bakazaka, yina tulaka yandi basabala na manima ya basabala na zulu ya mbombi, vwandaka kwenda na manima mpe na ntwala; tii, mabanza ya yandi kumaka mvindu, na yina yandi vwandaka kwenda na Damas, samu na kumeka na kunwana samu na kisika ya kubasikila, mutindu bakala mosi ke kwenda na mulangi ya whisky, samu na kumeka na kukatula kiadi.

<sup>83</sup> Yandi vwandaka na kati-kati ya yawu, ntangu Ndinga mosi katukaka na Zulu, Nsemo mosi ya nene yina vwandaka sema tubaka, “Saul, Saul, samu na yinki nge ke talisa Munu mpasi?” Yandi monaka Yandi. Yandi zabaka Yandi, ti Yandi vwandaka Yesu yina me vumbuka na lufwa, Yina yandi ndimaka lufwa, me vumbuka diaka na lufwa.

<sup>84</sup> Oh, mu lenda bambuka moyo na luzingu ya munu mosi, kuna na nzila ya kubeba, ntangu munu kuwaka Ndinga mosi ya lembami, “Mu kele Yesu. Munu kufwaka, Mu kele ya moyo mvula na mvula. Samu Mu ke zinga, beno mpe ke zinga.” Kubanda ntangu yina, mu me tula diboko ya munu na kati ya Yandi, mu me tula kivuvu na Yandi na kati ya bisika ya mudidi. Kana bantangu kukwisa kisika mu lenda mona ve, yinki nzila mu ke kwenda, mu ke tula kaka kivuvu na Yandi.

<sup>85</sup> Mukwikidi nionso ya Muklisto fwana luta na bakumekama yina. Mukwikidi nionso ya Muklisto fwana vwanda na zulu ya mbombi, samu ti yandi lenda basika na nzingilu mosi, “Mu zaba ti Mukudi ya munu kele moyo!”

<sup>86</sup> Beto me kwisa awa ve na suka yayi samu na kuvwanda kaka mpe kutubila diambu yina me lutaka, yina kele nionso ya kieleka, kasi beto me kwisa awa na kimbangi mosi na suka yayi, “Mu zaba ti Yesu Klisto kele Mwana ya Nzambi, mu me zaba yawu kukondwa ntembe! Mu zaba ti Yandi me vumbuka na lufwa, mpe Yandi ke zinga na kati ya munu bubu yayi. Yandi kele ya munu mpe mu kele ya Yandi. Mu ke kabula difwa na Yandi, na Kimfumu ya Nzambi.”

87 Paki! Paki ke nata kima ya nene, mvumbukulu, kivuvu ya malu-malu. Beno me bakula yawu na suka yayi? Ya ke na kati ya ntima ya beno? Beno zaba ti Mukudi ya beno kele moyo, mpe Yandi ke sala ti mambu nionso kusala kintwadi?

88 Beno ke tuba, “Mpangi Branham, mu me vwanda awa, mu ke vingila ndonga ya bisambu.”

89 Nzambi ke na kusala yawu kaka kieleka samu na mambote. Samu na yinki mwana-bakala yina ya ntalu, kilumbu yina, mpofo ntangu yandi butukaka? Ti Nzambi lendaka baka nkembo mpe kubalula mbanza. Ya kieleka, Nzambi me zaba yina Yandi ke na kusala. Nzambi me zaba. Mpe Yandi ke tulaka beto na zulu ya mbombi, samu na kutalisa beto nkembo ya Yandi.

90 Na yawu, na suka yayi mu ke tuba mutindu yayi, nkundi. Na manima ya bamvula makumi tatu na mosi ya ministere, na manima ya bamvula makumi tatu na mosi ya bivimbu ya kilanga ya kusalu, mu ke zola pesa kimbangi ya munu samu na yayi. Mu me monaka bakiadi. Mu me monaka ntangu yina mu vwandaka lomba bima, mpe mu vwandaka dila samu na bima, mpe mu vwandaka bondila samu na bima, mpe mu kubwaka samu na kuzwa yawu. Kasi kana mu ke vingila kaka na mvibudulu na Nzambi, na yina mu zaba ti ya kieleka ya ke sala kaka mbote, ya ke basika kaka na mutindu ya mbote, ya ke sala kaka diambu ya mbote.

91 Ntangu mu zimbisaka bébé ya munu, mwana ya munu ya fioti Sharon, mu . . . yina vwandaka diambu yina salaka ti munu kubula dibaku. Mu tubaka, “Wapi mutindu yina lendaka vwanda samu na mambote? Wapi mutindu ya lendaka vwanda samu na mambote?” Mpe bangonda na manima, ntangu mu monaka yandi me telama kuna na kitoko nionso ya mwana-kento ya ntwenia, vwandaka tuba na munu, telamaka na lweka ya wagon yina ya ntama ya kubeba, kuna, mu zabaka, kana yandi lendaka zinga, yandi lendaka tambula yimbi. Nzambi zolaka kubaka yandi ntangu yandi vwandaka na lutondo mpe lembami. Mu zaba ti mu ke mona yandi diaka. Mu zaba ti mu ke mona yandi, mu zaba ti yandi ke na zulu ya konso kivudi ya ntembe.

92 Mu banza kento ya munu ya bamvula makumi zole na zole, yina ba bakaka, mwana-kento ya ntwenia kaka, mwa mama ya fioti kuna. Ntangu bazulunale pesaka nsangu awa, “Mama mosi ya ntwenia, révérend . . . , me kufwa,” oh, wapi mutindu ntima ya munu panzanaka! Mu zabaka ve yinki kusala.

93 Kasi bubu yayi mu zaba ti nionso yina salamaka samu na mambote ya munu. Mu zaba ti luzingu fwana vwanda na ntoto, mpe ya fwana kunionga, ya fwana vwanda ya kukamuna, samu na kubasisa yina ke na kati ya yawu, kuna. Ya vwandaka na ba-Branham mingi kuna na kati, yina ba lendaka basisa na ntwala Nzambi kukitalisa Yandi mosi.

94 Ya vwandaka na mingi ya beno na kati ya beno, na yina Nzambi zolaka basisa yawu, na nzila ya bakumekama. Mpe na ntangu kukamuna yina vwandaka landila, ya ke kuma ngolo. Kasi na manima ya mwa ntangu fioti, mazulu ya mpembe ke vutuka, na yina beno ke mona lukanu ya Nzambi. Na yina beno ke boka, “Mu zaba ti Mukudi ya munu kele moyo, mpe na kilumbu ya nsuka Yandi ke telama na zulu ya ntoto! Kana misobi me bebisa nzutu yayi, kasi na nzutu ya munu mu ke mona Nzambi!” Bakumekama yayi ya fioti mpe bima yina kele kaka samu na mwa ntangu fioti, mpe ya ke zimbana mpe ya ke luta. Kasi ya ke salama kaka samu na mambote ya beno, beto bambuka moyo na yawu, ti Nzambi ke baka nkembo.

95 Beto kulumusa bayintu ya beto na mwa ntangu fioti. Mu ke zola kuyufula beno, na ntwala kisambu, ya ke na muntu mosi awa yina ke zola ti ba bambuka yandi na mpova ya kisambu na ntwala beto sukisa? Nzambi sakumuna nge. Bantu yikwa na kati awa zola kutuba, “Mu zola Nzambi, na ngunga ya kumekama ya munu ntangu yayi, na kupesa munu nzingulu ya malu-malu, ti mu lenda kuma diaka ya malu-malu”? Telemisa diboko ya nge, tuba, “Mu ke zola—mu ke zola yayi kuvwanda mvumbukulu samu na munu, Paki mosi, samu na kuvumbula munu na bivuvu ya malu-malu mpe bangolo ya malu-malu, mavimpi ya malu-malu mpe kiesa ya malu-malu.” Mfumu sakumuna beno, bantu ya munu ya luzolo.

96 Oh, Nzambi ya beto mpe Mvulusi ya beto, beto ke vutula matondo mingi na Nge samu na Paki yayi, samu na yina ya zola tuba na bantima ya beto. Mpe na nzila ya lukwikilu, kuna, na simu ya yinsi, beto lenda mona Nkwizulu ya Mfumu, Yesu, mutindu Yandi ke na kukubama Yandi mosi ntangu yayi, na kutulaka bilele ya Yandi ya kimfumu. Mpe, Dibuundu ke na kulwata, Kento ya makwela ya ntwenia ke na kulwata robe ya Yandi ya makwela. Lukutakanu ya nene ke zola kusalama ntama mingi ve.

97 Mbombi yayi ke vwanda ve mvula na mvula. Ntangu beto ke kuwa bantu ke seka, ke na kusawula beto, mpe ke bokila beto na nkumbu yina ya masakuba ya “ba-exalté,” mpe ke sawula beto, mpe ke tuba ti bayintu ya beto ke sala mbote ve, oh, ya ke landila ve ntangu nionso, Mfumu. Kasi beto vwanda mutindu Job, simbaka kimbangi ya beto, beto vwanda mutindu Daniel na dibulu ya bankosi, to bana ya ba-Hebreux na dibulu ya tiya, to Abraham na nzietolo ya yandi.

98 Sadisa beto, O Mfumu, na kutelama ya kieleka tii beto ke mona kima yina ya nene ke salama, “Ntangu mpungi ke bula, mpe bayina kufwaka kati na Klisto ke vumbuka na lufwa; beto yina ke zinga mpe ke bikala beto ke soba, na ntangu mosi, na mbwetolo, ya disu.” Na manima ke kwisa Paki yina samu na beto, yina Klisto sepelaka na yawu mwa bamvula funda mosi

na nkama yivwa me luta na suka yayi, mpe tuba, “Samu Mu ke zinga, beno mpe ke zinga.”

<sup>99</sup> “Yesu yayi, yina me zanguka na kati-kati ya beto, ke vutuka kaka mutindu Yandi kwendaka.” Beto ke mona Yandi, ata mpe na konso kidimbu ya mputa na diboko ya Yandi mpe konso kitini ya bansende na zulu ya yintu ya Yandi. Beto ke mona Yandi.

Oh, mu ke mona Yandi, mu ke mona Yandi,  
Mpe ya kuvuukisa mu ke telama na lweka ya  
Yandi.

<sup>100</sup> Yinga, Mfumu, ntima ya munu ya mputu, mutindu nzutu yayi ya munu ya kulemba me banda na kufumbama na nsi ya kizitu, minianga mpe bampasi ya ntangu ya kubuka mbuma na bilanga, ya kupanza nsangu na bilanga, mpe bakumata mpe bakukulumuka, mpe luswaswanu kati-kati ya balongi ya lunangu, mpe nionso yina, na kisika, mpe bantu ya luvwenzo, mpe bangolo ya yimbi. Kasi, O Mfumu, kilumbu mosi beto ke kwisa mutindu Elie, kuna na nzadi; beno tala kuna, ya kukanga na konso yinti, pusu ya tiya yina ke zangula beto. Bika beto zaba ti mbombi yayi kele bavwale yina ke pekisa beto na kima yina ya nene yina kele na ntwala, nkembo yina ya nene.

<sup>101</sup> Bika beto bikala ya kieleka mutindu Job, tii beto ke mona Yandi, mbunzu na mbunzu. Bika ti beto vwanda ya kieleka mutindu Mfumu ya beto vwandaka, mutindu mbandu ya beto, samu na kukwenda na Calvaire samu...ya kukubama na kukomama na kulunsi, mpe kukomama na kulunsi na Yandi, ti ya ke vwanda na mvumbukulu na kati ya luzingu ya beto. Pesa yawu, Mfumu.

<sup>102</sup> Bika ti, kana ya ke na bantu ya masawula awa, yina vwandaka mutindu Paul ya ntama, yina vwandaka sawula, bika bawu mona Paki na nzila ya bawu na suka yayi. Pesa yawu, Mfumu.

<sup>103</sup> Beto ke sambila, Mfumu, ti bayina kele na zulu ya mbombi ya kubeba, mbombi ya kimbevo, ti yayi ke vwanda ngunga yina ba ke kukuulama.

<sup>104</sup> Mazono na nkokila, mu vwandaka tuba na kento yina ya fioti kuna na remorque, na bakala ya yandi; wapi mutindu ti kuna na Phoenix, na mutindu mosi ya mpasi, mpe ba-cancer yina ya nene me vwanda kuna na zulu ya bawu, mpe ntangu yayi bubu yayi ba kele na mavimpi ya mbote mpe ya kitoko. Mpe mwa bébé yina vwandaka na ntima ya yandi ya kubasika na nganda, yandi me vwanda awa na kati ya kivinga na suka yayi, na mavimpi ya kitoko, ya mbote. Mwana-bakala ya fioti ya mpofo yina vwandaka na kati ya mudidi mpe yina me monaka nsemo ya kilumbu ata fioti ve, kele na kutambula bubu yayi mpe yandi ke mona nsemo ya kilumbu. Mpe, O Nzambi, wapi mutindu beto ke tonda Nge samu na yayi! Mpe nionso ke na kutala na simu yina ya vwale, na kilumbu yina ya nene ya mvumbukulu.

Pesa yawu, Tata. Mpe bika bawu kuzaba ti bima yayi fwana vwanda mutindu yina, ti yayi: mwana-bakala ya fioti lendaka mona, ti mwana ya fioti yina kele na mpasi ya ntima fwana pesa kimbangi na bayankaka. Bima yayi nionso ke sala kintwadi samu na mambote ya bayina ke zolaka Nge.

<sup>105</sup> Nionso fwana salama samu na beto samu Mosi tumamaka na kumekama, ya vwandaka na Mosi Yina nungaka kumekama, ya vwandaka Yesu. Mosi Yina vwandaka ya kutumama mingi na Tata, tii Tata vumbulaka Yandi na lufwa na suka ya Paki, samu ya zolaka salama ve ti lufwa kusimba Yandi. “Samu Mu ke bika ve Muntu ya Munu ya Santu kupola, to Mu ke bika ve moyo ya Yandi na difelo.” Samu, Yandi vwandaka ya kwikama, na kusalaka ntangu nionso yina vwandaka sepelisa Tata.

<sup>106</sup> Nzambi, bika beto vwanda ya kwikama na kisika ya kisalu. Ata yinki mutindu bakumekama ya beto kele mpe bampasi ya beto, nionso yina, bika ti beto vwanda na kiyeka ya kutuba, ntangu nionso, “Mu zaba ti bima nionso ke salaka kintwadi samu na mambote ya bayina ke zolaka Nzambi.” Pesa yawu, Tata.

<sup>107</sup> Beto ke sakumuna bantu yayi na suka yayi na masakumunu ya Nge. Ba me katuka na suka-suka na bisika ya bawu, ba me kwisa na tabernacle. Ba me kwisa samu na kubaka kikesa. Bika ti bawu kwenda na yinzo na suka yayi, na Ngolo ya Mpeve-Santu ke pela na kati ya bantima ya bawu, na kutambulaka na nzila mutindu bayina katukaka na Emmaüs, na kutubaka, “Bantima ya beto vwandaka pela ve na kati ya beto, mutindu Yandi vwandaka tuba na beto mutindu yina?” Pesa yawu, Tata. Mu ke pesa bawu na Nge ntangu yayi, na Nkumbu ya Mfumu Yesu Klisto. Amen.

Mbote mingi, Mpangi Neville. Mpe ntangu yayi beno bambuka moyo na balukutakanu.

<sup>108</sup> Beto ke vwanda ve na bakalati ya bisambu na suka yayi, samu ti, kana beto kele na bakalati ya bisambu, na ntangu bantu yayi kele ya kutelama awa mutindu yayi, mu ke tula kaka ntima na dikabu yayi. Mu fwana vwanda na kisika tii mu ke tula yawu na lweka, kisika yina mu lendaka basika awa mpe lenda . . . mu kele na boma. Ya ke monana ti mu ke na boma, mpe mu ke na boma ti mu ke sala kifu. Kuzimbisa bitumba, kele kuzimbisa mvita ve. Patton zimbisaka bitumba mingi, kasi yandi zimbisaka mvita ata fioti ve. Ya kieleka. Mpe beto ke zimbisa bitumba mingi, diaka, kasi beto ke zimbisa mvita ve. Mu ke sala bifu mingi, kasi mu ke zimbisa Diambu ve. Nzambi me pesa yawu, mpe Nzambi ke keba yawu. Ya ke—ya ke kupakulama. Mpe ntangu yayi ya kele ntangu, mu ke kwikila ti ngunga yawu yayi, mpe mu me banda, mutindu ya ke Paki bubu yayi, Mu ke landila—landila mutindu mu salaka kuna na kusambilaka samu na bambevo. Mpe kana mu lenda . . . Ya ke kupakulama. Ya kele kima mosi fwana salama na kati ya munu. Mu me mesana na

yawu mingi ve. Ya ke kwisa na mutindu mosi, mu lenda vwanda ve na kiyeka ya kuzaba yawu kaka, kasi mu fwana landila na kukwenda na sika ya yawu tii mu ke zaba yawu konso ntangu. Na yawu yayi ke vwanda kilumbu yina mu ke meka, na lemvo ya Nzambi.

<sup>109</sup> Mfumu kusakumuna beno ntangu yayi. Mpangi Neville. Mpe balukutakanu ke banda na ngunga ya yivwa na ndambu. Mpangi Neville.



*MU ZABA* KNG60-0417s  
(I Know)

BANDANDANI YA NSANGU YA PAKI

Nsangu yayi ya Mpangi William Marrion Branham, kulongamaka na Kingelesi, na suka ya Lumingu ya Paki na kubasika ya mwini, na kilumbu ya 17na Ngoda ya yiya, na mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)